

為校理李貴為同知經筵○丁巳諫院啓曰前信川郡守金守玄奪人之功以  
為已有其處心奸巧之狀臣等論列已盡而既有查覈之命故臣等不敢強聒  
姑待兩道之查報矣今見平安監司狀啓守玄所為極其無理比之本院所聞  
尤有甚焉前後情迹昭不可掩如此之人不可齒在衣冠之列請命削去仕版  
全羅都事許掇以本道監試試官科場之間顯然行私科次不公同參試官與  
之相詰至欲徑出而不參他道舉子亦有隨往而得參者所聞騰播士情齊憤  
請削去仕版 答曰並拿鞫定罪○都承旨洪瑞鳳啓曰今月十二日政臣以  
吏批該房不得進參下吏書送政目而臣之女婿朴潢在於知製教被抄之中  
臣初不經意茫然看過數日之後全然置之相忘之域矣即者伏見朴潢辭免  
之疏相避之法至嚴而臣昏謬不察不即啓達不勝惶恐待罪 答曰勿待罪  
○戊午夜一更西方有氣如火光○已未禮曹啓曰練祭節次今當磨鍊五禮  
儀練服注但云練布為冠去負版辟領衰婦人截長裙不令曳地云禮記練冠  
緌緣注曰用練易其冠又以練為中衣又曰正服不可變練衣中衣之承衰者  
也又曰男子除首經婦人除腰帶以此觀之則五禮儀之練制不及中衣又不  
論婦人變除節次者恐是闕文也家禮之練服楊氏亦謂之踈略似當以禮經